

12. oktober 2016

UKA2016/49

Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminnut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortat Kalistat Lund aamma Múte Bourup Egede, Inuit Ataqtigiit)

Siullermik oqaluuserisassanngortitsissunut qujanaq, pingaaruteqartuutuvoq piumasaqaatitalimmik siunnerfilersorluni ingerlatsinissaq taamaammat nuannaarutigaarput tamanna pillugu oqalliseqataanissamut periarfissaqartinneqaratta.

Siumumiit pingaartitaraarput nunatsinni ingerlaavartumik suliffeqarfiit siulersuisoqarfiillu nunaqavissunik sapinngisamik amerlanerpaanik atorfeqartitsilluni akisussaaffigineqarlutillu suliniuteqartuarnissaq. Pingaaruteqarpoq ilinniarsimasut ilinniaqqiffinnilu ilinniagaqarlutik naammaasisaqartartut amerliartortillugit tulluarsagaasumik ingerlatsinerit nalimmassarneqartuarnissaat.

Upernaaq Siumumiit oqaluuserisassanngortitsivunga Ingerlatseqatigiiffinni tamakkiisumik Pisortat pigisaanni siulersuisuni nunaqavissut amerlanerussuteqarnissaat qulakkeerniarlugu inatsissamik suliniuteqarneq ingerlanneqartariaqartut.

Naalakkersuisut akissuteqaateqarnerminni oqariartuutigaat tamakkiisumik isiginnilluni tamanna atortinneqareermat akuerineqartariaqanngitsoq, taamatut nalunaaruteqarneq Inuit Ataqtigiinniit maluginiarneqarluni paatsuunganartinneqarpoq oqaatigineqarmat, naak tunngaviatigut tapersiissuteqaraluartik, tapersiissuteqarnissamik oqariartornissaq apeqquserneqartoq.

Maanna oqaluuserineqartumi asserpiaanik akissuteqartoqarpoq, siunnersuuteqartut tunngavilersuutigaat nunatsinnut avataanniit suliartortartut annikillisikkiartuaarneqarnissaanik siunnerfigineqanngitsut, aammalu sivikitsuinnarmik nunatsinniilatsiaritarnermigut ilisimasaat annikittarmata killilimmik tunniussaqtartut.

Tamanna Naalakkersuisup akissuteqaatiminni oqaatigaat misissuineramik ingerlanneqaqqammersumik takuneqarsinnaasoq ukiuni kingullerni pisortat allaffissornikkut ingerlatsiviinni danskit nunanilu allamiut nunatsinnut suliartortartut ikileriarsimasut sulilu amerlaneruleralluttuinnartut sivisunerusumik ilinniarsimanissamik piumasaqarfiusuni suliffeqalartartut.

Siumumiit pingartipparput paasisat ilisimasallu tunngavigalugit sulinerup aquaasumik ingerlanneqarnissaat, taamaammatt ilisimaarilluinnarparput sulivataanniit suliarortussanik nunatsinni pisariaqartitsigatta aamma taakkununga atukkat qiviallattanissaat pisariaqartut.

Taamaattorli ilinniakkatigut pinnaanarput najoqqutaralugu alloriaqqittarnissaq annertuumik soqutigisaralugu illersugaraarput aammalu Naalakkersuisup akissuteqaateqarnermini oqariartuutigisaa nuannaarutigalugu.

Taamaakkaluortoq oqariartuutigineqartut imminnut naapertuutinngimmata pissutsit qulaajarlugit ingerlanneqartariaqartut Siumumiit pingartipparput, taammaattumik paaseqatigiinissaq siunertaralugu Inuussutissarsiornermut ataatsimiititaliamut ingerlateqqinneqarnissaat inassutigaaarput.

Suka K.Frederiksen
Siumut